



**UCAPAN KOMANDAN SEMPENA PERTANDINGAN
MENEMBAK SENJATA COLT M16 DAN PEMAKAIAN PANGKAT SERTA HACKLE
BAGI TAHUN 2014.**

Bismillahir-Rahmanir-Rahim

Assalamualaikum w.b.t , Salam Sejahtera dan Salam Ilimu, Keihlasan dan Kecemerlangan UniMAP.

Yang Berusaha Mejar Prof. Madya Dr. Zaliman Bin Sauli, Timbalan Komandan PALAPES UniMAP,

Yang Berusaha Mejar Sukri Bin Bakar, Ketua Jurulatih PALAPES UniMAP,

Para Pegawai Tetap dan Sukarela,

Jurulatih-Jurulatih, dan

Para pegawai kadet yang dihormati dan dikasihi sekalian.

Mukadimah

1. Dengan Nama Allah Yang Maha Pemurah Lagi Maha Pengasih. Sesungguhnya Segala Pujian Itu Milik Allah (S.W.T) Pemerintah Sarwa Jagat. Selawat Dan Salam Diucapkan Kepada Junjungan Besar Nabi Muhammad (S.A.W.), Para Sahabat Dan Ahli Keluarga Baginda.

2. Pertama sekali marilah kita semua memanjatkan rasa kesyukuran kepada Allah S.W.T kerana dengan limpah kurniaNya pada pagi yang mulia ini kita dapat bersama-sama dalam Acara Pertandingan Menembak Senjata Colt M16 dan Pemakaian Pangkat serta Hackle bagi Tahun 2014.

3. Sekalung tahniah dan setinggi-tinggi penghargaan juga dirakamkan buat seluruh Warga PALAPES UniMAP yang terlibat baik secara langsung mahupun tidak langsung sekaligus memastikan Kejayaan Latihan berterusan ini dapat dilaksanakan dengan jayanya. Syabas dan tahniah dari saya.

Latihan Unsur Penting Dalam Pembinaan Karektor Seorang Pegawai Kadet

Hadirin yang saya hormati sekalian,

BIARLAH BERMANDI PELUH SEMASA LATIHAN SUPAYA TIDAK BERMANDI DARAH DI DALAM MEDAN PEPERANGAN. Ini adalah ungkapan yang kita sering dengar bagi organisasi keselamatan. Latihan merupakan elemen terpenting dalam melahirkan seorang Pegawai Kadet yang mampu berbakti kepada agama, bangsa dan negara. Tahap kecergasan dan kecedasan anggota adalah perlu di tahap yang maksima kerana jika seseorang pegawai kadet itu status kecergasan dan kecerdasan berada pada tahap yang kurang memuaskan, sudah semestinya benteng pertahanan negara yang akan dipertanggungjawabkan tidak akan dapat dipertahankan. Dalam konteks ini, ingin saya tekankan sekali lagi dimana dalam ucapan saya pada Majlis Santapan Rejimental tempohari saya telah menyarankan supaya seluruh lapisan kepimpinan PALAPES UniMAP untuk memberikan perhatian yang serius kepada kualiti latihan yang diajar kepada setiap Pegawai Kadet kerana setiap latihan yang diterapkan itu sudah pasti akan menjadi panduan untuk pertahanan Negara suatu hari nanti .

Saudara Saudari Pewaris Generasi Bangsa,

Melahirkan seorang Pegawai Kadet yang mempunyai sikap dan disiplin yang tinggi adalah satu tugas yang cukup berat untuk direalisasikan. Pelbagai cabaran dan dugaan pasti akan datang. Namun jika hasrat baik dan murni ini dilentur dan ditempa sudah pasti ia akan mengikut acuan yang telah ditetapkan. Sebagai contohnya, jika inginkan sebilah keris yang berkualiti maka ia sudah pasti akan melalui pelbagai proses yang cukup teratur. Ia sama juga dengan melahirkan seorang Pegawai Kadet. Jika kita inginkan Pegawai Kadet yang kuat dari aspek mental dan fizikal maka pelbagai aspek perlu dititikberatkan samada melalui latihan ketenteraan mahupun ilmu akademik. Konsep kesamarataan ilmu ketenteraan dan akademik perlu wujud dalam sanubari setiap pegawai kadet.

Saudara saudari pegawai kadet sekalian,

Di majlis ini juga, saya ingin mengambil kesempatan untuk mengucapkan tahniah dan syabas kepada PALAPES dibawah pimpinan **Mejar Prof. Madya Dr. Zaliman Bin Sauli**, selaku Timbalan Komandan PALAPES UniMAP, atas daya dan usaha mempromosikan PALAPES tanpa ada sedikit rasa jemu pun akhirnya terbalas jua hari ini apabila seramai **192** orang pegawai kadet Peringkat Junior, **129** orang Peringkat Intermediate dan **166** orang peringkat Senior dan jumlah keseluruhan adalah seramai **487** orang. Angka keseluruhan ini merupakan satu angka yang cukup besar ertinya bagi PALAPES UniMAP. Justeru itu, saya ingatkan sekali lagi kepada anda semua yang berada dihadapan saya ini untuk kuatkan mental dan cekalkan azam untuk terus kekal dalam PALAPES sehingga anda semua ditauliahkan sebagai Pegawai Muda dalam Rejimen Askar Wataniah.

Seperingatan satu tujuan khas kepada mereka yang telah diberikan pangkat. Pemberian pangkat merupakan satu amanah dan tanggungjawab yang cukup

besar yang perlu di pikul dan bukan untuk dibanggakan-banggakan. oleh itu laksanakan amanah yang diberi dengan penuh tanggung jawab.

Penutup

Oleh itu saya amat berharap agar saudara-saudari sekalian dapat menyerapkan segala harapan menjadi tindakan; segala tindakan direalisasikan menjadi kecemerlangan. Terus hidup PALAPES UniMAP; terus maju PALAPES UniMAP; dan terus cemerlang PALAPES UniMAP.

Akhir Kata Sekali Lagi Saya Merakamkan Ucapan Terima Kasih Kepada Seluruh Warga PALAPES UniMAP Kerana Menjemput Saya Ke Majlis Pada Pagi Ini. Usaha Kita Semua Adalah Untuk Memastikan Keamanan Dan Kemakmuran Negara, Akan Diberkati Oleh Allah.

Sekian, saya sudahi dengan Wabillahitaufik Walhidayah Wassalamualaikum Warahmatullahi Wabarakatuh.

Disediakan oleh : Lt Muhamad Azuan Mohamad Nasir -24 Oktober 2014